

# Il «Padrinadi» dat immediat vinavant ils daners

Duas ovras d'agid per la muntogna lavuran cun differentas strategias

DA CLAUDIA CADRUVI / ANR

■ Savens vegn il «Padrinadi svizzer per vischnancas da muntogna» scumbiglià cun il «Agid svizzer per la muntogna»\*. Las duas organizaziuns han dentant autras finamiras e lavuran a moda differenta cun las donaziuns.

Parallelas existan dentant. Omaduas organizaziuns gidan en las regiuns da muntogna. Ed omaduas organizaziuns spendan mintg'onn radund 30 milliuns francs. E forsà anc ina davosa parallela: En omaduas suprastanza hai glieud da num e pum: Il Padrinadi vegn manà da Luregn Mathias Cavely, l'antier president dal cussegl dals chantuns. Plinavant sesa anc l'antier cusseglier federal Leon Schlumpf en la suprastanza. Ma era il Agid svizzer per la muntogna ha cun Adlof Ogi in antier magnat a la testa.

Las duas organizaziuns han dentant autras finamiras: Il Padrinadi sustegna vischnancas u organizaziuns publicas. L'Agid da muntogna s'engascha per purs e lur manaschis.

## Il donatur sa nua ch'els daners van

Il «Agid da muntogna» è vegnì en la pressa perquai ch'el ha pers a la bursa radund 16 milliuns francs entaifer dus onns. I ha era fatg surstar che questa organizaziun ha mess a mantun ina gronda facultad.

L'anr è perquai s'infurmada co ch'els daners vegnan administrads tar il «Padrinadi svizzer per vischnancas da muntogna»: «Da principi dain nus ora immediat quai che nus retschavain», di il president Luregn Mathias Cavely. «Quels che spendan daners, quels spendan per in project concret», declera Cavely. Ils projects dal Padrinadi vegnian adina preschentads als donaturs. Lezs pon decider a tge project ch'els concedan la do-



Cun agid dal Padrinadi svizzer per vischnancas en basegn pon era lieus pitschens realisar l'infrastructura necessaria sco scolas, sereneras eav. L'acziun «munaida per uffants» ha gidà a financiar la sanaziun da la scola a Sarn.

FOTO J. MENOLFI

naziun. P.ex. sch'ina vischnanca da la Bassa vul sustegnair cun 300 000 francs il provediment d'aua d'ina pitschna vischnanca, lura va questa summa entirament vinavant per quest intent.

## Era donaziuns da 100 francs summan

Tranteren obtegna il Padrinadi grondas summas – fin tar in milliun francs. Quai na saja betg sulet glieud che stettia curt avant murir. Anzi, i dettia era persunas che spendian cun maun chaud.

Da l'autra vart dettian blers donaturs era 100 francs. Per tals donaturs muntia questa summa dapli che per in ritg ina pli gronda summa. «Jau pens bler vi da quests donaturs», di Cavely ed el remartga: «Quella glieud na dat betg per laschar metter sin banca.»

Il Padrinadi exista dapi radund 60 onns. Entaifer quest temp haja l'organizaziun sa chapescha era obtegnì intgins fondos ord iertas. I sa tractia betg da summas stravagadas. Ed i saja cler ch'ins mettia questas valutas sin banca e na sut il tarpet. (guarda fanestra).

## Tgi ha propi da basegn?

Ils problems da l'Agid da muntogna ch'èn vegnids enconuschents en la pressa na less Cavely betg commentar. «Jau n'hai betg investa en las actas dad autras organizaziuns», di el. I dettia singuls cas nua ch'el Padrinadi lavuria ensemen cun il Agid da muntogna. Ma entras quai ch'el Padrinadi saja sa specialisà sin vischnancas ed il Agid da muntogna sustegna plitost purs, chapitia quai darar.

Cavely fa dentant attent ch'el Padrinadi haja gist en quest connex in avantag. Las dumondas per sustegn, derivian adina da vischnancas. Quai muntia ch'els projects sajan gia vegnids lubids d'ina istanza publica u dal pievel.

Il «Agid svizzer da muntogna» perencunter obtegna adina dumondas da purs u privats. Tar tals dumondas saja quai pli difficil dad eruir tgi che haja da basegn e tgi na.

## Engaschament gratuit

«Nus essan tuts anteriurs politichers che avain pli baud lavurà en la publicità», di Cavely da ses consuprastants. Lezs s'engaschan tuts era sco experts e fan questa lavur gratuit. Radund 400 dumondas ad onn ston els examinar en detagl. «Igl è ina bella occupaziun», di Cavely: «Uschia pos jau insaco dar enavos insatge a la glieud che ha pli baud dà a mai la vusch.»

\* Las duas organizaziuns sa numnan per tudestg «Schweizer Patenschaft für Berggemeinden» respectiv «Schweizer Berghilfe».

## Cifras dal Padrinadi

Las cifras precisas dal Padrinadi obtegnan ins al secretariat a Turitg. L'administratura sa numna Barbla Krämer-Stalvies e deriva da Sent. Ella indichescha ch'el Padrinadi haja dà ora il 2002 30 milliuns francs. La reserva dal Padrinadi a la fin da l'onn 2002 muntava 23 milliuns. Ensemen cun ils daners che vegnan prendids mintgamai ord ils fondos, muntass questa reserva gist a la summa d'ina expensa annuala dal Padrinadi, di Krämer. Cun questa reserva vul il Padrinadi garantir ch'el po era gidar, sch'i dat ina giada betg tantas donaziuns.

Radund 5 fin 6 milliuns francs reparta il Padrinadi mintg'onn en il Grischun.

## Chapital da fondos?

Il chapital dals fondos dal Padrinadi munta a 9,7 milliuns francs.

Il Agid da muntogna perencunter possede la fin dal 2002 ina facultad da 100 milliuns francs.

Ils quintes annuals dal Padrinadi u da l'Agid da muntogna chattan ins sin las paginas d'internet da las duas organizaziuns: [www.patenschaft.ch](http://www.patenschaft.ch) respectiv [www.berghilfe.ch](http://www.berghilfe.ch).